

故不足無藏也故有餘聖人所以既以為人已愈有與人已愈多或分人以德或分人以財示人以信與人為善積而能散博而能化莫非天下為公之意○林氏曰聖人之道虛一而已何所積乎未嘗不為人也在己者愈有未嘗不與人也而在己者愈多其猶天道然虛而不屈動而愈出為人與人言以道化物也

天之道利而不害聖人之道為而不爭
呂氏曰天道陽也故好生而惡殺謂之有利而無害春夏故生之育之秋冬故成之熟之以其至公無私每成人之善而不成人之惡與人之利而不與人害故曰天之道利而不害天不言而善應常應之以實而不以文聖人體之以為和法之以為用

施而為之明於天通於聖所謂六通四闢為萬物之宗而不爭也○何氏曰善利萬物而不害者天之道善為萬事而不爭者聖人之道易曰乾始能以美利利天下不言所利大矣哉太哉乾元剛健中正純粹

精也雲行雨施天下平也體乾聖人備道全美博施濟眾大有為而靡有爭一乾元之妙用也老子末章先去言中及人後同天聖人功用至此豈不大備哉知易則知老○林氏曰天之道雖有美利而不言所利則但見有利而無害繞有利之名則害亦見矣聖人之道無為而無不為而未嘗自恃其有故不與物爭而天下莫能與之爭一書之意大抵以不爭為主故亦以此語結○李氏曰天地大德曰生故曰利而不害聖人守位曰仁故曰為而不爭只這不爭二字為日用久又純熟則自然造混元之境真常之道至是盡矣象帝之先明妙之本得矣

道德真經集義卷之十

進道德經論兵要義述狀

器五

右臣伏以君之至明貴能下聽臣之至誠貴有上聞微臣性識庸愚智慮寡薄久從戎府不到朝廷特蒙陛下俯貸殊私擢居重任四年之內再領方州無分聖主憂勤不救生靈罷弊胡顏尸素久冒寵榮夙夜兢兢庶幾無微不至以報效退難補過進責思忠願獻芻蕘庶裨萬一至於上明天道中酌人情下稽地理莫不竭盡臣子之誠冀報君父之德惟詩也三百義必在於無邪惟經也五千理必歸於自正伏惟皇帝陛下體至道為人君以無事理天下一自臨馭萬國康寧日月不照之鄉聲教猶暨霜露表均之地恩信仍加刑罰措而得謂無克于戈戰而亦不復用無為無事雖休勿休海內歡娛天下幸甚是以微臣狂簡輒敢竊踞前伴論兵要義述上下兩卷今離為四卷并叙表等不揆荒蕪用申懇款伏乞

聖慈昭鑒俯賜優容布問公卿式明穿鑿然後退死溝壑臣所甘心瀝血吐誠伏待罪責不勝惻迫戰越之至謹差子將尚璿謹具別封進上謹奏

元和四年七月日

手詔

初王真尚璿至省所陳獻具悉卿職在藩條誠存禪補本乎道德之旨參以理化之源用究玄微有茲述作省閱之際嘉歎良深秋涼卿比平安好道書指不多及

二十九日

叙表

臣真言臣聞昔者庖犧氏作承天地理萬物猶以為

皇道不足故寂然思化精義感通然則天既不言而生地既不言而有故河出龍圖洛出龜書所以示其文也由是得以畫卦象制文字焉逮夫智慧萌生真樸潛消則文字之理又不足故載誕我玄元皇帝以代天地而言將善救其弊者也是以謄詩然五千之文殷

勤懲惻斯亦至矣可謂登道德之根源絕言語之枝葉比之文章則三辰昭回于天也擬乎動植則萬物充盈于地也論其教戒則百行全備于人也何謂禮者亂之首亂猶理也亂矣非禮則無以理之故曰亂之首也夫文

者武之君也武者文之備也斯蓋二柄兼行兩者同出常居左右孰可廢墜故曰忘戰則危好戰則亡是知兵者可用也不可好也可戰也不可忘也自軒轅黃帝以兵過亂少昊以降無代無之暨于三王之興雖有聖德咸以兵定天下則三王之兵皆因時而動動畢而後戢戢即不復用也及至嗣君或驕或僻或暴或淫或怒或貪或矜或忌乃為我師我旅我國我家動必取強用必求勝載窮載黷且戰且前或不戰而自焚或無厭而取滅塗萬姓之肝腦決一人之忿怒毒痛海內災流天下是以道君哀其若此又不可得而廢去遂不得已而用之夫聖人用兵之道不以其愠怒也不以其爭奪也不以其貪愛也不以其報怨也

蓋整而理之蓄而藏之以謹無良以威不聽非用之於戰陣非用之於殺伐非用之於田獵非用之於強梁此聖人用兵之深旨也又怒者逆德也兵者凶器也爭者人之所甚惡也若以逆德用凶器行人之所甚惡豈容易哉故曰上德者天下歸之上仁者海內歸之上義者一國歸之上禮者一鄉歸之無此四德者人不歸也不歸即用兵用兵即危之道也故謂不祥之器又曰死地所以王者必先務於道德而重用兵也抑臣又聞之創業之主亡亡以成其功繼體之君存存以保其位故聖人以不必則兵戎可得而戢衆人以不必之則戰伐益興故道君非獨諷其當時侯王蓋亦防其後代人君輕用其兵也由是特建五千之言故先舉大道至德修身理國之要無為之事不言之教皆數十章之後方始正言其兵原夫深哀微旨未嘗有一章不屬意於兵也何者伏惟道君降於殷之末代征伐出於諸侯當其時王已失衆正之道也又矣且不得指斥而言

故極論沖虛不爭之道柔弱自卑之德以戒之夫爭者兵戰之源禍亂之本也聖人先欲理其源絕其本故經中首尾重疊唯以不爭為要也夫唯不爭則兵革何由而興戰陣何因而列故

道若叮嚀深誠其有旨哉其有旨哉夫天地何言陰陽不測是以

道若強為之名而立文字欲人知之使其行之非難知也非難行也況我國家祖有道而宗有德流聖裔而派仙源乎唐哉皇哉不可得而稱也伏惟睿聖文武皇帝陛下聰明文思濟世溫恭鑽十葉之鴻輝傳千億之命緒闡皇道而有萬物私帝德而貞百度察然不動神而化之戰于戈於方輿之時却行陣於已利之地無為無事上德上仁貴五千之至言賤百二之重險結繩而理大化克彼於生靈擊壤之歌至德並闡於野老天下幸甚天下幸甚臣少習儒業長無武功觀昇平於明盛之時賴亭育於仁壽之域是以不揆庸陋敢傷聖人之言甘心從鼎鑊之誅儆倖納芻

蕘之志臣伏以道德經文遠有河公訓釋中存嚴氏指歸近經開元注解微臣狂簡豈敢措詞今之所言獨以兵戰之要採摭玄微輯錄道德經中章首為題序列如左各於題後粗述

玄元皇帝聖旨或先經以始其事或後經以終其義謬將臆度用達管窺既無百中之能庶均萬分之一因號曰道德論兵要義述詞理荒鄙塵瀆宸嚴無任惶懼戰越之至謹言

道德經論兵要義述卷之一

道可道章第一

臣真述曰夫稟二氣而生居三才之際靈於萬物者謂之最靈靈於最靈者謂之聖人聖人代天地而理萬物者也於是因言以立道因道以制名然異於真常之元故曰可道既為萬物之母故曰可名又天地之道無跡可尋故曰常無欲以觀其妙聖人之作有物有物可觀故曰常有欲以觀其微觀猶示也且乾坤之用因無入有是以同出異名變化之理因有歸無是以同謂之玄蓋天地之道四時行焉百物生焉是為一玄也聖人之道代天理物各正性命復為一玄也故曰玄之又玄是以道君將明王者治天下安萬國正師旅執不由於此戶者也故曰衆妙之門臣伏惟玄元皇帝所建五千之文將垂億祀之紀同天地之覆載比日月之照臨利將無窮人受其賜故王者得之可以適天下諸侯得之可以安萬邦卿大夫得之可以凝庶績士庶